



*“I te cherdì con to ennom” dij le Signur.*

La ploania d'La Pli tol sò con ligreza te sòa comunité **Hélena Pedevilla** (Rü) y ti fej les miús aodanzas ai geniturs Simon y Katrin: Idio, la Oma dal Ci y la Santa Patrona acompagnei Osta mōta con sòa benedisciun y proteziun.

### Enformaziuns dal Consei pastoral:

- **en Lönesc de Pasca vegnel porté la Santa Comegnun tles ciases** a chi co ne sciafia nia da jí a messa. Preitambel se anunzié pa Jan Agreiter, ☎ 339 6758622, cina en Pasca da sera.
- **i enviun der bel düc i scolari dla elementara y dla mesana** da tó pert ales messes dla domegnes y dles festes **te dlijia**, tai posc a ei rresservés (banc y proches); i periun ince che ai vái dai pici üsc ete y fora. Samben él ince tan bel da odei scolari dla scora alta co ven ciamó sò dant!



### Enformaziuns y termins

**Ciasa de Palsa:** l'aministrazion dla Ciasa de Palsa Ojöp Freinademetz A.P.S.P. forma na **gradatōra por ejams por la enciaria a cogo/cōga** (4<sup>a</sup> cualifica funzionala) a tomp determiné. Condiziuns d'azés: diplom de scora mesana - diplom de concluiun de aprendistat da cogo/cōga y almanco trei agn d'esperionza de laur - zertificat de trilinguism A2 (ex- D). Al pó to pert aspiranc/antes dal grup linguistich ladin. La gradatōra formada ará la dōrada de trei agn. I/les aspiranc/antes messará dé dant plü avisa tla domanda de ester desponibli/es por enciaries a tomp determiné (de cōrta dorada) a tomp parzial 50% (19 ores al'edema). Les domandes sōn le formular arjigné ca aposta (da descarié dla plata internet [www.ciasadepalsa.it](http://www.ciasadepalsa.it)) o sōn cherta sciompla con i documonc revardenc, messará gní presentades te scretariat dla Ciasa de Palsa **anter les 12:00 dai 20.04.2021**. D'atres enformaziuns é da ciaté te scretariat, ☎ 0474 524786.

### Bona Pasca a düc canc tla pêsc de Crist rosserí.

<b>Döt le bun a:</b>	Giovanna Pedevilla, Bornech	* 04.04.1934
	Gustl Winkler	* 04.04.1937
	Rosa Maneschg ved. Erlacher, San Sciomun	* 09.04.1939
	Paola Maria Palfrader	* 10.04.1933
	y a düc chi co á santennom y complesc i agn cōst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns:** cina le **dedemesaledema** sera a Franz Rigo, ☎ 0474 500978 o ✉ ploania@gmx.net  
**Download plata:** [www.unitepastorala.org](http://www.unitepastorala.org)



## Plata dla Ploania La Pli de Mareo Santa Maria dal Bun Consei

Ploian: Signor Klaus Sottsas  
✉ klsottsas@rolmail.net

Calogna Al Plan: ☎ 0474 501006  
Radio de Ploania: 93,00 MhZ



VAL BADIA  
www.unitepastorala.org

Ann B

04.04.2021 - GRAN FESTA DE PASCA

n. 19



📖 St.Ap 10, 34a.37–43 | Col 3, 1–4 | 1 Cor 5, 6b–8 | Jan 20, 1–18


### Dal Vangelo do San Jan:

<sup>1</sup>Le pröm de dal'edema, é Maria da Mágdala jüda da doman adora, canch'al ea ciamó scür, fora dala fossa y á odü che la pera ea tuta demez dal sepolcher. <sup>2</sup>Ara é saltada debota da Sciomun Pire y dal discepul, a chel che Gejú ti ore a bun, y ti á dit: An á tut le Signur fora de sepolcher, y i ne san nia, olach'an l'á motü. <sup>3</sup>Danló é Pire y l'ater discepul jüs ia y fora y é roés fora dal sepolcher; <sup>4</sup>ai ea saltés entrami deboriada, mo deache l'ater discepul ea plü asvelt co Pire, é chel roé por pröm dal sepolcher. <sup>5</sup>Al s'á cufé jö y ete y á odü les fascas de lin ia por tera, mo al n'é nia jü ete. <sup>6</sup>Dertan ea ince roé adalerch Sciomun Pire, co ti gnea do, y é jü ete tal sepolcher. Al á odü les fascas de lin ia por tera <sup>7</sup>y la peza dal assös co ea stada sòle ce de Gejú; ara n'ea nia pa les fascas de lin, mo dlungia, lobrida adöm te n post despartí. <sup>8</sup>Spo é ince jü ete l'ater discepul, co ea roé por pröm dan le sepolcher; al á odü y á cordü. <sup>9</sup>Ai ne capia nia ciamó la Scritōra, che al messá pō rosserí dai morc.

**I periun:** Gran Dio, i festejun le zenter de nosta fede: la mort y la rressoreziun de to Fi.

Fá de nos porsones de Pasca  
co dá ennant speranza y mostra ligreza.  
Por Crist, nosc Signur.

Vesco Wilhelm Egger "Sonntagsbibel"



📖 Letōres dla Secunda domegna de Pasca - Domegna blancia:  
St.Ap 4, 32–35 | 1 Jan 5, 1–6 | Jan 20, 19–31

## Edema liturgica dai 04.04. ai 11.04.2021

<b>DOM 04.</b>	<b>GRAN FESTA DE PASCA</b> <i>Isidor, Konrad, Heinrich Richter</i>
<b>08:30</b>	salüde ala festa, "Vidi aquam", <b>gran messa</b> ciantada solena por döta la ploania, <b>benedisciu dal signé</b> , <i>oferta por la ploania</i> <i>♪ Josef Haydn, "Kleine Orgelsolomesse"</i>
10:00	s.m. a Al Plan
<b>Lön 05.</b>	<b>LÖNESC DE PASCA</b>   <i>Vinzenz Ferrer, Crescentia, Iuliana</i>
<b>08:30</b>	s.m. por reingrazié y perié i Angeli Custodi s.m. por † Tone Daverda, Ierghele s.m. por †† Germano y Maria Frontull, Mareo
dedô	<b>funziun dal Bato de Hélena Pedevilla</b>
<b>Ded 06.</b>	<b>dl'otava de Pasca</b>   <i>Zelesin, Sisto, Wilhelm</i>
<b>07:30</b>	s.m. por †† fredesc Florian, Stase y Nese Terza d'André s.m. por les Püres Armes
<b>Dem 07.</b>	<b>dl'otava de Pasca</b>   <i>Jan Baptist de la Salle, Albert</i>
<b>Jöb 08.</b>	<b>dl'otava de Pasca</b>   <i>Walter, Beata</i>
<b>→ 19:30</b>	s.m. d'aniversar por † Maria Kehrer ved. Vollmann, Slugher s.m. por † Herbert Morlang, Parü s.m. por †† fredesc Regina y Carlo Kehrer, Tisler
<b>Ven 09.</b>	<b>dl'otava de Pasca</b>   <i>Waltraud, Konrad</i>
07:30	s.m. a Al Plan
<b>Sab 10.</b>	<b>dl'otava de Pasca</b>   <i>Engelbert, Hulda, Magdalena G.</i>
<b>07:30</b>	s.m. en onú de Santa Maria dal Bun Consei s.m. por † Carlo Ploner, Corterei
18:00	s.m. <i>prefestia a Al Plan</i>
<b>DOM 11.</b>	<b>Secunda domegna de Pasca</b> <i>Gemma Galgani, Stanislaus</i> <b>Domegna blancia</b> <b>Domegna dla misericordia de Chel Bel Dio</b>
<b>08:30</b>	<b>gran messa</b> por döta la ploania → <i>oferta de solidarieté por le clerus</i> s.m. por †† Jep y Rosa Maria Ellecosta, Lüchesc
10:00	s.m. a Al Plan
<i>ampola:</i>	por benefaturs vis y †† de nosta dlijia
<i>ministronc:</i>	• <b>dedolönesc y sabeda:</b> Judith y Jacklyn • <b>jöbia y domegna:</b> Maria y Manuel
<i>i recordun:</i>	Maria Kehrer ved. Vollmann † 04.04.2017 Germana Lanz Pezzei, Schweiz † 10.04.2014

## Rosserí

„Mort y endô en vita“  
Co pón pa s'enmaginé val de te?  
Co pón po roé do a val de te?

Nos podun na vita alalungia  
ma proé da capí cōsta cossa:  
“Gejú á davagné sora la mort,  
Chel Bel Dio l'á ressuscité.”

I n'orun lapró nia se enjómé ia  
dōtes che pices ressozeziuns  
de nosta vita:

*Rosserí y se fá coraji do vigne dolor.*  
*Rosserí y s'an anfidé da speré da nō*  
*do vigne delujiun.*  
*Rosserí y ciaré da se gní do vigne strit.*  
*Rosserí y ciaté n tru nō do vigne fal.*  
*Rosserí y odei n de nō do na net scōra.*  
*Rosserí – atló y sen*  
*y vigne iade proé da capí*  
*empü' deplü, de Pasca.*

Cōsta é mia aodanza por te!

Regenbogen

## 📖 Lönesc de Pasca – Romagn pa nos, Signur! (Lc. 24, 13-35)

*Nos sun düc desco i dui discepui sön le iade a Emmaus. Emmaus é pordert endlunch. Le tru da jí danló é le tru de vigne cristian, le tru de vigne porsona. Sön nostes strades é Gejú ressorí nosc compagn de iade, zonza ch'i le conesciunse.*

“Ne se vardea nia le cōr tal piet, canch'al baià con nos sön tru y nes spligà les Scritōres?” *se dijea önn al ater i discepui da Emmaus.*

*Ince nosc cōr mess se daorí sō y “pié fū” canche i encuntun Gejú, canche i tolun sō te nos sōa Parora y so Corp. Emplís con le fū dla fede te Gejú Crist rosserí orunse porté so amur fora por le monn.*

Benedet XVI°

## 📖 La Bibia cuntada ai mituns (13)



### La storia dla Bibia che iu á le plü ienn

Saste ci storia dal Nō Testamont co mo plej le plü belo da picio ensö? Al é la storia, te chera che Gejú lascia gní pormez i mituns, s'ai tól tai brac y i benedesc. Forsc vegnel ince töa storia preferida. Ara ven cuntada tal Vangelo de San Merch (10,13-16):

Canche Gejú roâ con sū discepui te na ciüté o te n paisc saltà la jont adalerch, düc orea odei Gejú. Düc orea l'aldí y baié empara, la ligreza ea grandiscima.

En de èl roé zacotan de peri y omes con sū mituns da Gejú. Ai orea perié Gejú che al i metess sō les mans a sū mituns y i benediss. Ai orea che Gejú periass por ei. Canche i discepui de Gejú á odü gnenn adalerch düc chi geniturs con sū mituns s'ái dessené. Ai brunterà y orea i paré demez. Ai ponsâ che Gejú ess val plü d'emportant da fá co se dé jö con chi mituns. Mo canche Gejú á odü cōsc ál dit a sū discepui: „Lascede che i mituns vegni da me y no ti al proibide! Deache de ei é le Regn de Dio.“ Y Gejú á dit ennant: „Chel co ne tól nia sō le Regn de Dio desco en môt, ne podará nia ji ete.“ Spo ti é Gejú jü adancuntra ai mituns, i á tut tai brac, ti á motü les mans sön le ce y i á benedí.